

दिनांक 08.06.2023

समय: 18.45 बजे

- भारतीय रिजर्व बैंक रेपो रेट मांय कोई बदलाव नी कीनो- चालू माली साल सारू जी.डी.पी. री रेट साढे छह फीसदी रेहवण रो अनुमान।
- सरकार देशभर मांय महिलावां री हिफाजत सारू 733 वन स्टॉप सेन्टर बणाया- 300 केन्द्र और बणाया जावेला।
- जोधपुर डिस्कॉम रा तैत बिजली ऊं वंचित 1 लाख 15 हजार घरां ताई बिजली पूगायी जावेला।
- दक्षिण पश्चिम मानसून केरल पूग्यो-प्रदेश रा केई जिलां मांय आज आंधी सागे बिरखा रा आसार।

000

भारतीय रिजर्व बैंक मौजूदा माली साल री दूजी द्विमासिक मौद्रिक नीति रो ऐलाण कर दीनो है। रिजर्व बैंक मुख्य रेटां जस-री-तस राख्यी है। रेपो रेट साढे छह फीसदी रा लेवल माथे ही बणी रेहवेला। आर.बी.आई. रा गवर्नर कह्यो के उपभोक्ता मूल्य सूचकांक मांय ई साल मार्च ऊं अप्रैल रे दौरान कमी आयी है। वे कह्यो के ई माली साल मांय महंगाई री रेट चार फीसदी ऊं बत्ती रेहवेला। दास कह्यो के ई साल चौमासा री बिरखा सामान्य रेहवण रा आसार है। रिजर्व बैंक सकल घरेलू उत्पाद- जीडीपी मांय बधोतरी री रेट साढे छह फीसदी रा लेवल माथे ई बरकरार राख्यी है। रिजर्व बैंक रा गवर्नर कह्यो के बैंक अब रूपे प्री-पेड फोरेक्स कार्ड जारी कर सके है। ई सागे ई रिजर्व बैंक ई-रूपी वाउचर रो दायरो बधावण रो ऐलाण ई कीनो। शक्तिकांतदास दो हजार रुपया रा नोट पाछा लेवण रो ई जिकर कीनो। वे कह्यो के ई फैंसला रा तीन सप्ताह पछे सरकार रो खर्चो बधबा ऊं नकदी रो लेन-देन बध्यो है। दास कह्यो के दो हजार रुपया रा कोई आधा नोट बैंकां मांय पाछा जमा करा दिया ज्या है या दूजा नोटां ऊं बदल दिया ज्या है। वे कह्यो के बैंकां मांय दो हजार रुपया रा नोट जमा करावण वाळां री भीड़ नी है। रिजर्व बैंक रा गवर्नर जनता ऊं दो हजार रा नोट बदलावण या जमा करावण सारू आखिरी तारीख रो इंतजार नी करण बाबत् कह्यो।

000

देश मांय हाल ताई सात सौ 33 वन स्टॉप सेंटर बणायी ज्या है अर महिलावां री हिफाजत सारू तीन सौ और ऐडा सेंटर बणावण सारू बजट मंजूर करी ज्यो है। आं वन स्टॉप सेंटरां मांय हिंसा या परेशानी ऊं पीड़ित महिलावां ने एक छत हेटे पुलिस, ईलाज रा सुबीता, कानूनी मदद अर राय अर अस्थाई रेहवास मुहैया करावण री व्यवस्था करीजी है। भारतीय जनता पार्टी री आला नेता अर केंद्रीय मंत्री स्मृति ईरानी आज नई दिल्ली मांय भारतीय जनता पार्टी रा मुख्यालय मांय खबरनवीसां सागे बातचीत करता थकां आ जाणकारी दीनी। ईरानी लारला नौ साल मांय देश मांय महिलावां रा भला री न्यारी-न्यारी योजनावां रो जिकर करता थकां कह्यो के देश मांय ई बगत 34 ऊं बत्ती महिला हेल्प लाइन काम कर रही है। केंद्रीय मंत्री कह्यो के देश मांय आंगनबाड़ी कार्यकर्तावा ने हाल ताई ग्यारह लाख स्मार्टफोन मुहैया करा दिया ज्या है।

000

वे कह्यो के पोषण ट्रैकर प्रणाली रो नौ करोड़ ऊं बत्ता लोग फायदो उठा रह्या है। मंत्री कह्यो के प्रधानमंत्री मातृ वंदना योजना रा तैत देश मांय कोई तीन करोड़ 32 लाख महिलावां रा बैंक खातां मांय 13 हजार छह सौ पचास करोड़ रुपया भेजी ज्या है। केंद्रीय मंत्री कह्यो के सरकार देश मांय एक हजार ऊं बत्ती फास्ट ट्रैक अदालतां खोली है, ज्यां मांय ऊं चार सौ 18 अदालतां खास तौर ऊं यौन अपराधां ऊं बच्चां ने बचावण ऊं जुड़्या पॉक्सो कानून री है।

000

राज्य सरकार भारतीय पुलिस सेवा रा 20 अहलकारां रा तबादला कर दीना है। आं मांय ऊं 15 ने नुवा ऐलाण करी ज्या जिलां मांय पुलिस विशेषाधिकारी रा तौर ऊं तैनात करी ज्या है। कार्मिक विभाग री ओर ऊं जारी हुकम रे मुजब हवा सिंह घुमरिया ने एडीजी ट्रैफिक, विजय कुमार सिंह ने एडीजी साइबर क्राइम अर तकनीकी सेवा, रुपिंदर सिंह ने भरतपुर रेंज आईजी, राहुल प्रकाश ने जयपुर रा अतिरिक्त पुलिस आयुक्त ट्रैफिक अर प्रशासन अर रामेश्वर सिंह ने उप महानिरीक्षक पुलिस सतर्कता बणायी ज्या है।

000

झालावाड़, बूंदी अर बांसवाड़ा मांय सिंचाई परियोजनावां सारू राज्य सरकार 156 करोड़ 13 लाख रुपया मंजूर कीना है। ई रकम ऊं झालावाड़ जिला मांय राजगढ़ मध्यम सिंचाई परियोजना रा तैत फव्वारा पद्धति रा विकास रा काम, घुघवा लघु सिंचाई परियोजना रा तैत बणायी-चुणाई रा काम अर गागरीन सिंचाई परियोजना रा तैत पाणत जरूरी सुबीतां ऊं जुड़्या काम कराया जावेला। ई सागे ई बूंदी जिला मांय उतराना माइक्रो लिफ्ट सिंचाई परियोजना रा तैत बणाई-चुणाई रा काम अर बांसवाड़ा जिला रा कूपड़ा गांव मांय अनास नदी माथे एनिकट बणावण री मंजूरी ई दीनी है।

000

राज्य सरकार जोधपुर डिस्कॉम हलका मांय 1 लाख 15 हजार ऊं बत्ता बिना बिजली वाळा घरां मांय आरडीएसएस योजना रा तैत बिजली रा कनेक्शन देवणरी मंजूरी दीनी है। ई काम माथे कोई 322 करोड़ 61 लाख रुपया रो खर्चो आवेला। आं घरां ताई सौभाग्य योजना खत्म व्ह्यां पछे बिजली नी पूग सकी ही। ई सागे ई राज्य सरकार जन स्वास्थ्य अभियांत्रिकी विभाग रा 6 नुवा दपतर खोलण अर आं मांय 52 और ओहदा री मंजूरी दे दीनी है।

000

केन्द्रीय मंत्री अर्जुनराम मेघवाल कह्यो है के बीकानेर री जनता ने लारला नौ साल मांय केंद्र सरकार कानी ऊं चलायी ज्यी जनता रा भला री न्यारी-न्यारी योजनावां रो फायदो पूरी साफगोई सागे मिल्यो है। वे प्रधानमंत्री नरेन्द्र मोदी री अगुवाई वाली केन्द्र सरकार रा कामकाज रा नौ साल पूरा व्हेवण रा सिलसिला मांय आज बीकानेर मांय राख्यी ज्या जनसंवाद कार्यक्रम मांय बोल रह्या हा। केन्द्रीय मंत्री श्रीकोलायत मांय राख्यी ज्या कोलायत प्रीमियर लीग मांय सिरकत करण वाळां सागे मौजूदा केन्द्र सरकार री नौ साल री उपलब्धियां रा बारा मांय बातचीत कीनी। केंद्र मांय मोदी सरकार रा नौ साल रा कामकाज रा बारा मांय भारतीय जनता पार्टी रा प्रदेश अध्यक्ष सी.पी. जोशी आज चित्तौडगढ़ मांय कह्यो के 9 साल रो ओ कामकाज सरकार सेवा, सुशासन अर गरीब कल्याण रा तौर ऊं पूरो कीनो है। वे कह्यो के देश मांय सड़क, रेल अर हवाई यातायात ने आसान बणावण सारू मोदी सरकार केई ऐतिहासिक काम कीना है।

0000

दक्षिण-पश्चिम मॉनसून आज केरल पूग ग्यो। मौसम महकमा रे मुजब आवता 48 घंटां मांय मध्य अरब सागर, तमिलनाडु, कर्नाटक अर दक्षिण पश्चिम, मध्य अर पूर्वोत्तर बंगाल री खाड़ी रा कुछ और हलकां मांय दक्षिण-पश्चिम मॉनसून रे आगे चालण रा बेहतर हालात बण्योडा है। ई बीचे प्रदेश रा कुछ जिलां मांय आज आखा दिन लू बाजती रही, जदके सिंज्यां री पोर केई जिलां मांय आंधी चालण अर बादळा मंड जावण रे कारण मौसम पलट ग्यो। जयपुर मांय आखा दिन तेज गर्मी रही। चुरु मांय तेज तावड़ा अर लू रे कारण जिंदगी माथे असर पड़्यो। बारां मांय सिंज्यां री पोर बादळा मंड जावण अर तेज बायरो बाजण ऊं गर्मी ऊं थोड़ी साता मिली। भीलवाड़ा मांय ई तेज गर्मी रही। मौसम विभाग आज जयपुर, अजमेर, नागौर, टोंक, सीकर, भरतपुर, दौसा, बूंदी, कोटा, बारां अर सवाईमाधोपुर जिलां मांय तेज आंधी चालण सागे बिरखा व्हेवण अर बीजळी पड़बा रा आसार जताया है। महकमो आंधी- बारिश रो दौर एक-दो दिन और चालण रा आसार जताया है।

000

भोपाल मांय चाल रह्या 66वां नेशनल स्कूल गेम्स मांय चुरू री रितु कुमारी प्रदेश ने कांसा रो तमगो दिरायो है। रितु कुमारी आज भोपाल मांय व्ही शॉट पुट होड़ मांय 13 दशमलव 28 मीटर दूर ताई गोळो फेंक कर र 19 राज्यां अर केन्द्र रा राज वाळा प्रदेशां रा 117 खिलाड़ियां बीचे प्रदेश ने कांसा रो तमगो दिरायो। ई रे अलावा न्यारा-न्यारा भार वर्गां मांय जोधपुर अर उदयपुर रा पांच मुक्केबाज सेमीफाइनल मांय पूग ग्या। आं खेलां मांय राजस्थान रा खिलाड़ी हाल ताई सोना अर चांदी रा दो-दो अर कांसा रो एक तमगो जीत्यो है। नेशनल स्कूल गेम्स मांय प्रदेश रा खिलाड़ियां री ई कामयाबी माथे शिक्षा मंत्री डॉ. बी. डी. कल्ला खुशी जताता थकां खिलाड़ियां ने बधाई दीनी है।

000

जयपुर रा सवाई मानसिंह इंडोर स्टेडियम मांय आज प्रीमियर हेंडबॉल लीग-पीएचएल सरू व्हे रही है। पैला दिन घरेलू टीम राजस्थान पैट्रियट्स रो मुकाबलो महाराष्ट्र आयरन-मैन सागे है। ई मैच पाछे तेलुगु टैलन्स अर गर्वित गुजरात बीचे मुकाबलो व्हेला। लीग जीतण वाली टीम ने 11 लाख रुपया अर दूजा नम्बर माथे रेहवण वाली टीम ने पांच लाख रुपया री रकम देर नवाजी जावेला।

000

जोधपुर कृषि विश्वविद्यालय मांय मसाला साखां रा बारा मांय 17वीं सालाना समीक्षा बैठक राख्यी जा रही है। आज सरू व्ही दो दिन चालण वाली राष्ट्रीय स्तर री ई मीटिंग मांय देशभर मांय मसाला ऊं जुड़ी साखां रा बारा मांय काम कर रह्या वैज्ञानिक शिरकत कर रह्या है। म्हाणा खबरनवीस बतायो के मीटिंग मांय मसाला वाली साखां रा बारा मांय परम्परागत अनुसंधान सागे आं रा दवाइयां रा गुणां रा बारा मांय ई चर्चा करी जा रही है।

000

केंद्रीय संचार ब्यूरो री ओर ऊं आज जयपुर रा प्रधान आयकर कार्यालय मांय अहलकारां अर कर्मचारियां सारू राष्ट्रीय आयुर्वेद संस्थान री मदद ऊं योगाभ्यास कार्यक्रम राख्यी ज्यो। राष्ट्रीय आयुर्वेद संस्थान रा सहायक आचार्य डॉ. पुनीत चतुर्वेदी री अगुवाई मांय ओ योगाभ्यास करी ज्यो। 21 जून ने मनाया जावण वाळा अंतर्राष्ट्रीय योग दिवस ऊं पैली जनता मांय जाग जगावण सारू ब्यूरो री ओर ऊं योगाभ्यास रा कार्यक्रम राख्या जा रह्या है।

000